

### आकाशवाणी

पैहले खास-खास खबरां:-

1. लोकसभा च अज्ज त्रंऊ विधेयक संविधान 131मां संशोधन बिल- हदबंदी विधेयक ते केन्द्र शासित प्रदेश कनून संशोधन विधेयक पर चर्चा परतिए शुरु होग।
2. राज्यसभा च अज्ज उपसभापति आस्तै चुनां होग।
3. प्रधानमंत्री नरेन्द्र मोदी होरें फ्रांस दे राष्ट्रपति हुंदे कन्नै पच्छिम एशिया दी स्थिति पर फोन पर गल्लबात कीती। उ'नें होर्मुज जल-डमरु-मध्य च सुरक्षा ते जहाजें दी अजादी कन्नै आओ-जाई यकीनी करने पर सहमति जताई।
4. इजरायल ते लोबनान बश्कार 10 दिनें दा युद्ध विराम कल रातीं लागू होई गेआ।
5. अमरीकी राष्ट्रपति डोनाल्ड ट्रम्प होरें दावा कीता जे ईरान परमाणु हथियार बनाने च इस्तेमाल होई सकने आहले अपने यूरेनियम गी ओदे हवाले करने लेई राजी होई गेआ ऐ।
6. ते आई.पी.एल क्रिकेट च कल रातीं मुम्बई दे वानखेड़े स्टेडियम च खेड्ढे गेदे मैच च पंजाब किंग्स नै मुम्बई इंडियन्स गी 7 विकट कन्नै हराया।

<><><><><><>

### LS -Women Reservation Bills

लोकसभा च अज्ज त्रंऊ बिलें संविधान (131मां संशोधन) विधेयक बिल 2026, हदबंदी विधेयक 2026 ते केन्द्र शासित प्रदेश कनून संशोधन विधेयक पर चर्चा परतिए शुरु होग। इनें त्रौनें विधेयकें दा मकसद लोकसभा ते राज्य ते केन्द्र शासित प्रदेशों दी

विधासभाएं च महिला सदस्यें दी गिनतरी बदाना ऐ। “नारी शक्ति वंदन” अधिनियम कन्नै सरबंधी संविधान (106मां संशोधन) अधिनियम 2023 दे राएं लोकसभा ते विधानसभाएं च महिलाएं दी लगग इक तिहाई सीटां आरक्षित कीतियां गेइयां हियां। एदा मकसद लोकतंत्र बवस्था च महिलाएं दी हिस्सेदारी यकीनी करना ऐ। एह त्रैवे विधेयक निर्वाचन हल्के दी हदबंदी गी सखल्ला बनाने ते लोकसभा ते विधानसभा च महिलाएं आस्तै इक तिहाई सीटें दे आरक्षण दे प्राधवानें गी लागू करने आस्तै आने गे न।

<><><><><><>

Amit Shah-Lok Sabha

केन्द्रीय गृहमंत्री अमित शाह होरें कल लोकसभा च केन्द्र शासित प्रदेश कन्नू संशोधन विधेयक 2026 पेश कीता। एदा मकसद केन्द्र शासित प्रदेश कन्नू 1963, दिल्ली ते जम्मू-कश्मीर सनं केन्द्र शासित प्रदेशें च संसदीय ते विधानसभा क्षेत्रें दे परतिए गठन दा प्रावधान करना ऐ। लोकसभा च कल होई दी चर्चा च हिस्सा लैन्द होई प्रधानमंत्री नरेन्द्र मोदी होरें आखेआ जे मुख्य दी 50 फीसद आबादी गी फैसला लैने दी प्रक्रिया च शामिल कीता जाना चाईदा। उ’नें आखेआ जे नारी शक्ति मुख्य दे विकास च महत्वपूर्ण भूमिका निभा’रदी ऐ ते नीति निर्माण च उनें’गी सेई प्रतिनिधित्व देना समें दी मंग ऐ। प्रधानमंत्री होरें विपक्षी दलें थवां इस ऐतिहासिक विधेयक गी राजनीतिक रंग नैई देने दी अपील कीती। उ’नें आखेआ जे सारे आस्तै ते मुख्य दे लोकतंत्र आस्तै एह लाहकारी ऐ। चर्चा च बोलदे होई गृहमंत्री अमित शाह होरें परिसीमन दे मगरा दक्खनी राज्यें च लोकसभा सीटें दी गिनतरी च कमी औने दी विपक्ष दी शेंकाए गी

खारिज कीता। शाह होरें आखेआ जे प्रस्तावित ढांचा दक्खनी राज्यें दी अगुआई च बाद्दा यकीनी करदा ऐ। बक्ख-बक्ख सियासी पार्टियें दे नेताएं एदे च हिस्सा लेता। केन्द्रीय गृहमंत्री अमित शाह होर अज्ज बी चर्चा दा परता देडंन।

<><><><><><>

#### RS- Election

राज्यसभा च अज्ज थवां सभापति आस्तै चुनां होग। केन्द्रीय मंत्री जे.पी. नड्डा होर नामजद सदस्य हरिवंश होरें'गी राज्यसभा दे उपसभापति दे तौरा पर चुने जाने दा प्रस्ताव रक्खडन। भारतीय जनता पार्टी दे सांसद एस.फैंगनॉन प्रस्ताव दा समर्थन करडन। एदे इलावा केन्द्रीय मंत्री निर्मला सीतारमण ते जयंत चौधरी- भाजपा अध्यक्ष ते राज्यसभा सांसद नितिन नवीन ते जनता दल यूनाइटेड सांसद संजय कुमार झा बी राज्यसभा दे उपसभापति दे तौर पर श्री हरिवंश हुंदे नां दा प्रस्ताव करडन।

<><><><><><>

#### WB- Voter List

पच्छिम बंगाल दे मुख् चुनां अधिकारी मनोज कुमार अग्रवाल होरें भरोसा दोआया ऐ जे मतदाता सूचि पंजीकरण पर सुप्रीम कोर्ट दे हालिया निर्देश दी अमलावरी च कोई मुश्कल नैई औग। उ'नें साफ कीता जे पूरी प्रक्रिया ऑनलाईन होग- जेदे कन्नै नागरिकें गी खीरी समें च मतदाता सूचि च अपना नां दर्ज करोआने दा मौका थ्होग। अग्रवाल होरें आखेआ जे प्रशासन पूरी चाली कन्नै त्यार ऐ ते सारे आवेदनें ते प्रक्रियाएं गी सूचारु ढंगै सिर संभालने आस्तै डिजिटल प्रणालियां मौजूद न।

<><><><><><>

#### PM-Macron Call

प्रधानमंत्री नरेन्द्र मोदी होरें फ्रांस दे राष्ट्रपति इमैनुएल मैक्रो हुंदे कन्नै फोन पर पच्छिम एशिया दी स्थिति पर चर्चा कीती। सोशल मीडिया दी इक पोस्ट च प्रधानमंत्री होरें दस्सेआ जे गल्लबात दौरान दौनै पक्खें होर्मुज-जल-डमरु-मध्य च सुरक्षा ते नौ वहन दी अजादी कन्नै आवा-जाई गी फौरी ब्हाल करने दी जरूरता पर सहमति जताई। प्रधानमंत्री होरें आखेआ जे उ'नें क्षेत्र ते ओदे थवां बाहर शांति ते स्थिरता गी बढ़ावा देने आस्तै मज़बूत सहयोग जारी रखने दी तस्दीक कीती।

<><><><><><>

#### PM- Chandra Shekhar

प्रधानमंत्री नरेन्द्र मोदी होरें साबका प्रधानमंत्री चन्द्र शेखर हुंदी जयंति दे मौके पर उनें'गी श्रद्धांलि भेंट कीती ऐ। मोदी होरें सोशल मीडिया पोस्ट च आखेआ जे एह बरा उं'दी 100मीं जयंति दी शुरुआत दा प्रतीक ऐ। एह बरा समृद्ध ते न्यायपूर्ण भारत दे उं'दे नजरिए गी साकार करने दी राष्ट्र दी वचनबद्धता पूरा करने दा मौका बी ऐ। प्रधानमंत्री होरें आखेआ जे दिवंगत प्रधानमंत्री चन्द्र शेखर होरें'गी साहस- दृढ़ विश्वास ते लोकतांत्रिक मूल्यें प्रति वचनबद्धता रखने आहले इक जन-नेता दे तौर पर चेता कीता जंदा ऐ।

<><><><><><>

#### Israel –Lebnan Ceasefire

इज़रायल ते लेबनान बशकार 10एं दिनें दा युद्ध विराम कल रातीं थमां लागू होई गेआ। इस फैसले करी बेरुत च जशन दा म्हौल ऐ। युद्ध विराम दा मकसद दौनें देशें बशकार कूटनीतिक स्तर उप्पर गल्लबात दा मौका उपलब्ध करोआना ऐ। अमरीकी बदेश विभाग ने आखेआ ऐ जे इस युद्ध विराम करी इज़रायल ते लेबनान बशकार स्थाई शांति ते सदभाव आली गल्लबात मुमकन होई सकोग। अमरीका दे राष्ट्रपति डोनाल्ड ट्रम्प होरें इज़रायल ते लेबनान बशकार 10 दिनें दे युद्ध विराम दा ऐलान कीता। उ'नें गलाया जे दवै नेता रमानदारी दी बता पर टुरने लेई युद्ध विराम पर राजी होई गे न। ट्रम्प होरें दौनें गी 1983 दे बाद पैहली बारी White House च सार्थक गल्लबात लेई साद्दा बी दिता ऐ। तोंआई नेतन्याहू होरें अस्थाई युद्ध विराम पर सैहमति जताई पर इस गल्ले पर जोर दिता जे इज़रायल दी फौज दक्खनी लेबनान च बनी दी रौहग।

<><><><><><>

Trump -Iran

अमरीकी राष्ट्रपति डोनाल्ड ट्रम्प होरें दावा कीता ऐ जे ईरान- परमाणु थेहार बनाने च इस्तेमाल होई सकने आले अपने यूरेनियम गी ओदे सुपुर्द करने लेई राजी होई गेआ ऐ। व्हाईट हाऊस च पत्रकारें गी इस बारे जानकारी दिंदें होई ट्रम्प होरें दस्सेआ जे दवै मुख्य शांति समझौते दे बड़े नेड़े पुज्जी गेदे न। उ'नें आखेआ जे अमरीका ते ईरान कामयाब गल्लबात दे राहें अगड़े बधा करदे न ते इस गल्ले दी बड़ी मती संभावना ऐ जे दौनें देशे बशकार तौले गै इक समझौता होई सकदा ऐ। अमरीकी राष्ट्रपति होरें

आखेआ जे जेकर एह समझौता होई जंदा ऐ तां तेल पर लग्गने आला टैरिफ खत्म होई जाहग- होर्मुज जल डमरु मध्य खुल्ली जाहग ते सब किश बड़ा शैल होई जाहग।

<><><><><><>

Goyal- South Korea

उद्योग ते बपार मंत्री पीयूष गोयल होरें कल दक्खन कोरिया दे बपार मंत्री येओ हान-कू हुंदे कन्नै वर्चुएल माध्यम राएं बैठक कीती। उ'नें सोशल मीडिया दी इक पोस्ट च आखेआ जे बैठक च दौनें नेताएं भारत ते दक्खन कोरिया बश्कार दपक्खी आर्थिक सहयोग सशक्त बनाने पर चर्चा कीती। बपार ते निवेश सरबंघें गी मजूबत बनाने सरबंघी वचनबद्धता जाहिर करदे होई गोयल होरें दौनें मुखें बश्कार व्यापक ते आपसी लाहकारी सांझेदारी गी अगगे बदाने पर जोर पाया।

<><><><><><>

JPP-RCS

कश्मीर घाटी च कारोबारिएं, खासतौरा पर फल-उत्पादकें ते दस्तकारी उत्पादें कन्नै जुड़े दे बपारिएं गी राहत उपलब्ध करोआने दे मकसद कन्नै उत्तर रेलवे दे जम्मू डिविजन आसेआ अज्जै थमां 17 अप्रैल थमां नमीं दिल्ली च आदर्श नगर ते कश्मीर च बडगाम बश्कार इक सांझी पार्सल प्रोडक्ट रैपिड कारगो रेल सेवा शुरू कीती जा'रदी ऐ। आकाशवाणी दे जम्मू संवाददाता दी रिपोर्ट मूजब एह सेवा आजमाइश दी बिनाह पर 31 मई धोड़ी नियमित चलाई जाहग ते मगरा इसी नियमित आधार पर बी जारी रक्खेआ जाई सकदा ऐ। ध्यानजोग ऐ जे रेल नंबर 00462 बड्डलै सवां 6 बजे बडगाम थमां चलग ते अगले दिन बड्डलै 5 बजे आदर्श नगर दिल्ली पुज्जी जाहग।

<><><><><><>

## IPL

आई.पी.एल क्रिकेट च कल रातीं मुम्बई दे वानखेडे स्टेडियम च खेड्ढे गेदे मैच च पंजाब किंग्स नै मुम्बई इंडियन्स गी 7 विकट कन्नै हराई दिता। 196 रन्ज दे लक्ष्य दा पिच्छा करदे होई पंजाब किंग्स नै 21 गेदां 7 विकटां बाकी रौहन्दे 198 रन्ज बनाइए मैच जिती लैता। अज्ज संजा साइडे 7 बजे अहमदाबाद दे नरेन्द्र मोदी स्टेडियम च गुजरात टाइटन्स दा मुकाबला कोलकाता किंग्स राइडर्स कन्नै होग।

<><><><><><>

## IMD –Weather

मौसम विभाग नै छत्तीसगढ़- मध्य- प्रदेश- महाराष्ट्र- उत्तरी आंतरिक कर्नाटक ते रायल सीमा च लू चलने दी संभावना जाहिर कीती ऐ। विभाग नै हिमाचल प्रदेश- जम्मू- कश्मीर ते लद्दाख च अज्ज ऐन-गड़ पौने दा ऑरेंज अलर्ट जारी कीता ऐ। उप-हिमालयी पच्छिम बंगाल- सिक्किम- उत्तराखंड- उत्तर पूर्वी राज्यें दे किश हिस्सें- तटीय आंध्र प्रदेश- ओडिशा ते राजस्थान च कल तगर बिजली पौने दी पेशगोई कीती गेई ऐ। हरियाणा- चंडीगढ़- दिल्ली- कर्नाटक ते पंजाब च बी इय्यै नैई स्थिति रौहने दी मेद ऐ। एदे इलावा विभाग नै दस्सेआ जे अज्ज तटीय आंध्र प्रदेश- तटीय कर्नाटक-गुजरात- केरल-माहे कोंकण- पुदुचेरी ते कारईक्काल च गर्म ते गुम्म आहला मौसम रौहने दी संभावना ऐ।

<><><><><><>